

Museo grandi lo atrae turista pa San Nicolas

Desaroyo San Nicolas a worde evalua cu Codesan

ORANJESTAD(AAN)--

Construccion prison nobo a worde acelera. Edicifionan di Gobierno y vivienda publico a worde construi. Diferente otro paso a worde tuma. Tur esaki den cuadro di intencionan pa sana e situacion na San Nicolas. Promer Ministro Mr. Henny Eman a elabora ariba un reunion cu a tuma lugar entre Gobierno y Codesan y de paso a muestra ariba loke ya a worde haci y loke lo worde haci pa recuperacion di San Nicolas en particular.

Antayera Gobierno a sostene un reunion cu Codesan pa asina evalua progreso y desaroyo di plannan pa San Nicolas. Promer Ministro Eman, den un entrevista cu DIARIO despues a trece dilanti, cu otro Gobierno a tuma rienda den man na 1986, el a worde confronta cu e respon-

sabilidad di crea miles di cupo di trabao pa esnan cu a keda desampara despues di ciera di Lago. Atencion especial mester a worde dedica na San Nicolas, cu a haya mas sla. Un Grupo especial di Trabao a keda forma y asina Gobierno hunto cu e grupo, cu despues a haya nomber di Codesan, a introduci un set di idea pa garantiza futuro di San Nicolas.

ACELERA DESAROYO SAN NICOLAS

Promer Ministro Eman a muestra ariba ideanan cu a worde poni den practica y cu ya a cuminsa haya ehecucion.

Na promer lugar tin e Prison nobo, cu ta bao construccion actualmente. Un inversion di 22 Millon ta acompaña realizacion di e proyecto, cu ariba peticion



especial di Gobierno, ta duna empleo especialmente na esnan cu ta biba den San Nicolas y vecindario.

Gobierno a duna contenido na su plan di decentralizacion y asina Selimar cu 180 trahador a muda completamente pa San Nicolas, caminda inicio a worde duna na construccion di dos edificio nobo pa Gobierno. Si un suma di 7.5 Millon ta acompaña construccion di e edificio nobo, 150 persona despues lo bay traha den e edificionan y asina aporta na e situacion na San Nicolas, cu tambe a mira movecion ariba tereno di vivienda publico. Un total di 52 cas di Pueblo a y ta worde construi na Village, loke ta significa tambe construccion y trabao pa esnan desemplea.

Financia pa Gobierno diferente actividad menos grandi a worde entama pa Codesan pa asina asegura actividad nobo.

Promer Ministro Eman a muestra cu e desaroyonan na San Nicolas a bay den bon direccion y cu mescos cu ta e

caso na henter Aruba, desempleo a baha.

ATRAE TURISTA PA SAN NICOLAS

Mientras por cuminsa mira resultado di desaroyonan, Codesan y Gobierno a sinta na mesa pa mira kico mester socede den futuro.

Un punto importante ta, cu ta trata di yega na un bon reparticion di turismo, den cual San Nicolas tambe ta haya su parti. Esey ta encera cu San Nicolas mester percura di tin atraccionan turistico.

Ta den cuadro di e pensamiento aki a dicidi pa introduccion di un museo grandi den centro di San Nicolas. Den e museo aki por inclui tambe e Museo Archeologico y e coleccion di moneda. Promer

Ministro Eman a splica cu aunke e coleccion di moneda ta uno priva, e tin e speranza cu lo coopera pa e por bay e Museo nobo.

Expresion artistico lo por worde descubri den e museo, cu lo dedica atencion especial na pintura y escultura. Un suma di 2.5 Millon lo worde poni disponible pa e museo, manera Promer Ministro Eman a splica.

Algun punto menor cu lo acompaña e plannan pa San Nicolas lo encera vigilancia na Promenade.

INFRASTRUC-TURA NOBO PA SAN NICOLAS

Promer Ministro Eman a splica cu awor cu e promer plannan di

emergencia a keda realiza, mester yega na un plan cu ta cubri un plazo largo.

Ta e intencion di Gobierno pa acerca companianan experto den planificacion di infraestructura pa asina por yega na ehecucion di e plan.

Diabierna Conscho di Ministros lo discuti e asunto y lo baymira si ta dicidi pa habri inscripcion pa expertonan interesada o cu ta bay acerca Sasaki directamente, como cu Sasaki ya tin experiencia cu e tipo di proyectonan aki na Aruba.

Pero si dicidi pa Sasaki o no, hecho lo ta, cu mester envolva Arubianonan den e realizacion di un infraestructura general y nobo pa San Nicolas.

TRANS-SHIPMENT DEN FASE EHECUCION

Un di e puntonan cardinal den desaroyo di San Nicolas tabata pa trece actividad nobo ariba e tereno cu antes tabata acomoda Lago.

Promer Ministro Eman a bisa DIARIO, cu ya e plannan pa yega na transshipment ta den fase avanza. E proyecto aki lo genera basta actividad pa San Nicolas, cu tambe lo mester mira industrianan nobo ariba e tereno menciona.

A cuminsa tuma pasonan pa prepara e tereno na forma accelera pa asina por ofrece e facilidad y acomodacion na e companianan interesa.

"Codesan ta den full swing", Promer Ministro Eman a bisa, tirando un vista ariba loke ya a worde haci y e plannan grandi cu ta worde proyecta.